

NEEMIAS

(Neemía)

Neemía rü natanüxügüçax nayumüxê

1 ¹Rü nhaa nixí i chauchiga i chama i Neemía ya Acaría nane nax chixíxü. Rü yexguma 20 ga taunecü ãëxgacü yixíxgu ga Artayére rü meama Quiréuarü tauemacügu (desêbru), rü chama ga Neemía rü ñane ga Chucháwa chayexma. ²Rü chauxütawa nangu ga chauenexê ga Ananí namaxã ga nhuxre ga yatügü ga Yudáanewa ne íxü. Rü yexguma chayoxnie ga nüxna nax chacaxaxü nachiga nax nhuxãcü ínangupetüxü ga Yerucharéüwa, rü nhachagürü: “¿Nhuxãcü nüxü ínangupetüxü i ngêma? ¿Rü yema Yudéutanüxügü ga Yudáanegu rüchoxü, rü mea nüxü nangupetüxü rü êxna tama?” nhachagürü. ³Rü nümagü rü choxü nangãxügü rü nhanagürügü: “Ngêma rü tama aixcuma mea inixü. Rü ngêma duüxügü i Yudáanegu rüchoxü rü porãcü ngüxü ningegü rü chixexü nüxü naxüpetü. Rü ngêma natapüx ya yima tóru ñane ya Yerucharéü rü nanaxãixrügumaraxütama ga nagu nax napogüexü, rü yema natapüxaru íãxgü

ga ínaguxü rü tautama nimexêégü”, nhanagürügü. ⁴Rü yexguma yemaxü chaxínügu rü porãcü choxü nangux rü chaxaxu. Rü nhuxre ga ngunexü rü chaxaure rü Cori ya Tupanamaxã chidexa. ⁵Rü nhachagürü nüxü: “Pa Cori Pa Tupana ya Daxücüãx, cuma rü Tupana ya guxãétiwa ngêxmacü quixí, rü cuxãücüma. Rü taguma naxüchicüxü i ngêma nüxü quixuxü, erü cuma rü namaxã quixaixcuma i ngêma duüxügü i cuxü ngechaüügüxü rü yanguxêégüxü i curü mugü. ⁶Rü ngêmacax i nhuxmax rü cuxü chacaxaxü nax choxü nüxü cuxínüxü i nhaa chorü yumüxê i chütacü rü ngunecü cumaxã nüxü chixuxü naxçax i ngêma curü duüxügü i Iraéutanüxügü. Rü nüxü chacaxax nax cupexewa chixexü taxüxü i toma i Iraéutanüxügü, rü woo i chama rü chautanüxügü rü cupexewa chixexü taxügü. ⁷Rü cupexewa porãcü chixexü taxügü, erü tama tayanguxêxê i ngêma curü mugü rü curü ucuxêgü ga curü duü ga Moichéwa tomaxã nüxü quixuxü. ⁸⁻⁹¿Rü nüxna nacuxãchi i curü ore i Moichémaxã nüxü quixuxü! Erü cuma rü nüxü quixu rü ngêxguma toma

chixexũ cupexewa taxũxgu rü tá togü i nachixũanegügu toxũ cuwoonemare, notürü ngëxguma chi wena cuxcax tawoeguxgu rü aixcuma nagu tamaxëgu i curü mugü, rü woo nhama i naane íyacuáxũgu tawoonegu, rü cuma rü chi tochixũanecax toxũ cuyagagü, rü ngëma nachica i üünexũ i cumatama nüxũ cuxunetaxũ nax nawa cungexmaxũwa wenaxarü toxũ cugagüxũcax. ¹⁰Toma rü curü duũxũgü i curü puracütanüxũ tixigü, yerü cuma rü curü poramaxã torü uanügümexëwa toxũ ícunguxũxëxë. ¹¹Pa Corix, cuxũ chachixewe nax choxũ nüxũ cuxĩnũxũcax i nhaa chorü yumüxë i cumaxã nüxũ chixuxũ i chamax nax curü duũxũ chixixũ. Erü ngëma chorü ngúchaũ i nagu charüxĩnũxũ nixĩ nax cuxũ chicuaxüüxũ. Rü ngëxgumarüxũ ta cuxna naxcax chaca nax choxũ curüngüxëxũ nax chamaxã namecũmaxũcax ya ãëxgacü”, nhachagürü.

**Artayére rü Neemíaxũ ningex nax
Yerucharéüwa naxũxũcax**

2 ¹Rü yexguma ga chama rü ãëxgacü ga Artayérearü cópuarü üäcuxürüxũ chixĩ. Rü wüxi ga ngunexũ ga Nisãũarü tauemacügu (abrü) ga yexguma Artayére marü 20 ga taunecü ãëxgacü yixixgu, rü naxpáxũ wíwímaxã chaxüäcuyane rü nüma ga ãëxgacü rü choxũ nadawenü ga nax changechaũchametüxũ. Rü yemacax choxna naca rü nhanagürü: ²“Cuxũ chadau nax cungechaũchametüxũ. ¿Taxacü cuxũ nangupetü? Tama cuwa nangox nax quidaxawexũ. ¿Rü ngëmacax taxacü cuxũ nangexma?

¿Ëxna wüxi i guxchaxũ?”, nhanagürü choxũ. Rü yexguma ga chama rü poraäcü chamuũ. ³Rü ãëxgacüxũ changãxũga rü nhachagürü: “Pa ãëxgacüx ;Guxũguma namaxũ! ¿Nhuxäcü chi i tama changechaũxũ? Erü yima ñane ya chaunatügü nagu taxgüne rü nachicaxicatama nixĩ, rü natapüxaru íãxgü rü ínanagu”, nhachagürü. ⁴Rü nüma ga ãëxgacü rü choxna naca rü nhanagürü: “¿Taxacüwa i cuxũ charüngüxëxũ?” nhanagürü. Rü yexguma ga chama rü Tupanamexëgu chaugü chaxũ. ⁵Rü ãëxgacüxũ changãxũga rü nhachagürü: “Ngëxguma chi cuxcax namexgu, Pa ãëxgacüx, rü choxũ curüngüxëxëchaũxgux, rü cuxna chaca, Pa ãëxgacüx, nax Yudáanewa choxũ cumuxũ nawa ya yima ñane ya chaunatügü nagu taxgüne, nax ngëmaäcü wena chanamexëxũcax”, nhachagürü. ⁶Rü ngíma ga ãëxgacümax rü nacüwawa irüto. Rü nüma ga ãëxgacü rü choxna naca rü nhanagürü: “¿Nhuxre i ngunexũ tá icuyarütaxuxũ nax ngëma cuxũxü? ¿Rü nhuxgu tá cutáeguxũ?” nhanagürü. Rü chama rü namaxã nüxũ chixu ga ngunexũ ga nagu tá chatáeguxũ. Rü yexguma ga nüma rü yéma choxũ namu. ⁷Rü yema to ga naxcax íchacaxaxũ nixĩ ga choxna naxãaxũ ga wüxi ga popera naxcax ga yema ãëxgacügü ga taxtü ga Eufrátëarü tocutüwa yexmagüxũ nax yemaacü norü naanewa mea choxũ namupetügüxũcax nhuxmata Yudáanewa changu. ⁸Rü to ga popera ga naxcax íchacaxaxũ, rü Achácax nixĩ. Rü nüma nixĩ ga ãëxgacüarü naixnecüarü daruxũ yixixũ. Rü yema poperawa rü ãëxgacü nüxna

naxãga nax mürapewa choxna tanaxãxũcax nax ngẽmamaxã chanamexẽẽxũcax i norũ iãxgũ ya yima Tupanapataarũ dauxũtaechica rü ngẽma ãnearũ poxeguxũarũ iãxgũ, rü yima ãpata ya nawa tá changexmane. Rũ nüma ga ãẽxgacũ rü choxna nanaxã ga guxũma ga yema naxcax íchacaxaxũ, yerü Cori ya Tupana rü poraãcü choxũ narüngũixẽ. ⁹Rũ yexguma taxtũ ga EufrátEARÜ tocutüwa yexmagũxũ ga ãẽxgacũgũxũtawã changuxgu, rü nüxna chanana ga yema poperagũ ga ãẽxgacũ ga Artayére yéma mugũxũ. Rũ choxũ ãnixũmũcũgũ ga nhuxre ga churaragũarũ ãẽxgacũgũ namaxã ga norũ churaragũ ga cowarutagu íxũ. ¹⁰Notürü yexguma Chaũbára ga Oróutanũxũgũarũ ãẽxgacũ, rü Tobía ga Amóutanũxũgũarũ ãẽxgacũ nüxũ cuaxgũga nax íchanguxũ, rü poraãcü nanue yerü nüxũ nacuaxgũ nax chautanũxũgũ ga Iraéutanũxũgũarũ ngũxẽewa nax chaxũxũ.

**Wena nanamexẽxẽ ga
Yerucharéütapũx**

¹¹⁻¹²Rũ düxwa Yerucharéüarũ ãnawa changu. Rũ yexguma tamaepũx ga ngunexũ yéma chayexmagu, rü chütacũ rü ícharũda. Rũ choxũ nüxũmũcũgũ ga nhuxre ga yatü nax ítayadaugũxũcax ga guma ãnearũ poxeguxũ. Notürü taxúemaama nüxũ chixu ga yema Tupana chauãewa nguxẽẽxũ nax taxacũcax Yerucharéüwa chaxũxũ. Rũ chaxicatama búruétũga chixũ. ¹³Rũ yematama chütaxũgu rü Ngategu áégaxũ ga iãxwa íchayaxũxũ rü Dragóũarũ Puchuwaama chaxũ

nhuxmata Guxchirearũ iãxwa changu. Rũ meama chanangugũ ga yema natapũx ga guma Yerucharéüarũ poxeguxũ ga nagu napogüexũ rü norũ iãxgũ ga ínaguxũ. ¹⁴Rũ nhuxũchi ichixũchigũ nhuxmata Dexá i Chuchuxũgu áégaxũ ga iãxwa changu ga ãẽxgacũarũ puchu íyexmaxũwa. Notürü ga chorü búru rü taxuacũma naétüwa naxüpetü ga yema natapũxarũ puexũ. ¹⁵Rũ yexguma rü tautama níngune. Rũ yema ngatexũwa dauxũ chaxĩ rü yéma chayangugũ ga yema natapũx. Rũ yemaacũ nüxũ íchayaxüegu ga guma ãnetapũx, rü wenaxarü Ngategu áégaxũ ga iãxwa chixücu. ¹⁶Rũ gumá ãnearũ ãẽxgacũgũ rü tama nüxũ nacuax ga ngextá nax chaxũxũ rü taxacũcax yéma chaxũxũ. Yerü taxũta yema chacherdótegũmaxã, rü ãnearũ ãẽxgacũgũmaxã, rü puracũtanũxũmaxã, rü yema togü ga Yudéugũmaxã nüxũ chixu nax taxacũcax Yerucharéüwa changuxũ. ¹⁷Rũ yemacax chanangutaquexexẽxẽ ga yema duũxũgũ rü nhachagürü nüxũ: “Pema meama nüxũ pecuax nax wüxi i guxchaxũwa íngexmagũxũ, rü daa ãane ya Yerucharéü rü nachixe, rü natapũxarũ iãxgũ rü ínagu. ¡Rũ ngĩxã wüxigu tanamexẽxẽ ya daa ãnearũ poxeguxũ nax ngẽmaãcü marü tama wüxi i cugüruxũ íxĩgũxũcax!” nhachagürü. ¹⁸Rũ yexguma namaxã nüxũ chixuxgu nax nhuxãcü Tupana poraãcü choxũ rüngũxẽẽxũ rü yema ore ga ãẽxgacũ ga Artayére chamaxã nüxũ ixuxũ, rü nüma ga duũxũgũ rü choxũ nangãxũgagũ rü nhanagürügü: “¡Ngĩxã itanaxügü nax namexẽẽxũ ya daa ãnearũ poxeguxũ!”

nhanagürügü. Rü inanaxügüe ga nax napuracüexü. ¹⁹Notürü yexguma Chaübára ga Oróutanüxügüarü äëxgacü, rü Tobía ga Amóutanüxügüarü äëxgacü, rü Yechéü ga Árabe ixixü nüxü cuáchigagu ga yema puracü rü toxü nacugüe rü togu nidauxcüraxügü. Rü toxna naca rü nhanagürügü toxü: “¿Taxacü ípexüe? ¿Ëxna nagu perüxínüe nax tama äëxgacüga pexínüexü?” nhanagürügü. ²⁰Notürü ga chama rü chanangäxüga rü nhacharügü: “Nüma ya dauxücüax ya Tupana rü tá toxü narüngüxë. Toma i norü duüxügü rü itanaxügü nax tanamexëxü ya daa ïanearü poxeguxü. Notürü i pemax rü nataxuma i taxacü i pexna üxü nawa i nhaa puracü”, nhachagürü nüxü.

.....

Norü uanügü nüxü nacugüe ga Yudéugü

4 ¹Rü yexguma nüma ga Chaübára nüxü ïnüchigagu ga nax namexëëgüaxü ga guma ïanearü poxeguxü, rü nanu rü norü numaxä toxü nacugü. ²Rü nhanagürü napexewa ga namücügü ga Chamáriaciüax ga churaragüarü äëxgacügü: “¿Taxacüga narüxínüe i ngëma Yudéugü i taiyamaxä yuechaüxü? ¿Rü nüma nagu naxínüegu rü chi wena nüxü tanaxüxë nax naxüna norü Tupanacax nadaixü rü ïnaguxü? ¿Ëxna nagu naxínüegu rü wüxi i ngunexügu tátama nüxü nagux i ngëma puracü i naxügüxü? ¿Ëxna ngëma naxtapüx i ngëxma äuxchitaxü i marü ixaexüwa tátama nadeaxü ya ngexwacaxücü ya nutagü?” nhanagürü. ³Rü naxütawa nayexma ga Tobía ga

Amóutanüxü. Rü nüma rü nhanagürü ta: “¿Dücax i ngëma naxtapüx i naxügüxü! Rü wüxi i cugüruxü nixí. Erü woo wüxi i ngowa dauxü nawa ïxgu rü tá nayawaxtapüxëxë”, nhanagürü.

Neemíaarü yumüxë

⁴Rü yexguma ga chamax, rü chayumüxë rü Tupanamaxä chidexa rü nhachagürü: “Pa Torü Tupanax ïnüxü naxínü nax nhuxäcü toxü nacugüexü! ¿Ëcü naxçaxtama natáeguxëxë i ngëma namaxä toxü nacugüexü, nax ngëmaäcü norü uanümexëgu nayixixüçax rü to i nachixüanewa nagagüaxüçax!” nhachagürü.

.....

Norü uanügü nanaxänüegü

⁶Rü nawa tapuracüeama ga yema ïanetapüx ga marü ngäxügu ixixü ga nax naxüxü. Rü nüma ga duüxügü rü norü ngüchaümaxä napuracüe. ⁷Notürü yexguma torü uanügü ga Chaübára rü Tobía rü yema Árabegü, rü Amóutanüxügü, rü Adóutanüxügü nüxü ïnüegu nax mea iyaxüxü ga yema puracü ga Yerucharéüarü poxeguxütapüxwa rü yema äxmaxëtügüxü rü marü nax nanhaxtagüaxü, rü nümagü ga yema uanügü rü poraacü nanue. ⁸Rü guxüma ga nüma rü wüxigu nügümaxä nagu narüxínüe nax Yerucharéüçax ïnaxiächixü nax nagu napogüexüçax ga naxtapüx. ⁹Rü yexguma ga toma rü tayumüxëgü, rü Tupanana taca nax toxü nangüxëxüçax. Rü nhuxüchi dauxütaeruxü itamugü nax chütacü rü ngunecü nadauxütaegüxüçax nax

yemaacü togü itapoxüxüçax. ¹⁰Rü nümamaxü ga yema Yudaánecüãxgü ga yema puracümaxã icuaxgüxü rü nidexagü rü nhanagürügü: “Rü ngëma puracütanüxü i nuta ínanugügüxü rü marü nipae erü namuxüchima ya nuta ya äüxchitacü, rü ngëmaäcü tagutáma tüxü name i ngëma naxtapüx”, nhanagürügü. ¹¹Rü yema torü uanügü rü nagu narüxínüe nax taxüchima nüxü tacuaxgüxü rü nüxü tadauxü ga yexguma chi bexma totanügu nachocüxgux nax toxü nadaixüçax, rü yemaacü nax íyachaxächigüxëãxüçax ga yema puracü. ¹²Notürü yema totanüxügü ga torü uanügüarü ngaicamagu pegüxü rü muexpüxcüna tomaxã nüxü nayarüxugüe, rü yema torü uanügü rü guxücüwawa toxçax nax íyaxüächichaüxü. ¹³Rü yemaçax ga chama rü chanamu ga duüxügü nax nügütanüxügüchigüäcü nügü íyanuxüçax ga yema naxtapüxpechitagu ga ínanuxchanexüwa rü ínaxámxaxetüchigüxüwa, rü taramaxã, rü wocaemaxã, rü würamaxã ixãxnexü nax yemamaxã nügü ínapoxügüxüçax. ¹⁴Rü yexguma nüxü chicuaxächigü ga nax namuüxü ga duüxügü, rü nüxna chaxu ga guxüma ga äëxgacügü rü duüxügü nax chamaxã nangutaquexegüxüçax, rü nhachagürü nüxü: “¡Tauxü i pemuüxü! ¡Rü nüxna pecuaxächie rü nüma ya Tupana rü poraxüchicü rü üünecü nax yixüxü! Rü ngëmaçax name nixí nax ípemexü nax perü uanümaxã pegü pedaxü rü ípenapoxüxü i pemüçügü, rü petanüxügü rü pepatacüãxgü”, nhachagürü nüxü. ¹⁵Rü yexguma torü

uanügü nüxü cuáxchigagügu ga toma rü marü nüxü nax tacuáxü ga yema nagu naxínüexü, rü Tupana rü marü toxü ínapoxüxü, rü yemaçax ga nümagü rü toxna nixígachitanü. Rü toma rü naxçax tawoegu ga nawa nax tapuracüexü ga yema íanearü poxeguxütapüx. ¹⁶⁻¹⁷Notürü yexgumaüçüxü rü ngãxütücumü ga duüxügü napuracüe rü yema totücumü rü nadauxütaegü ga meama ixãxnexü wocaemaxã rü würamaxã. Rü nanangaxcu ga norü poxüruügü ga escüdügü, rü nacüxcu ga naremüarü poxüruxü. Rü yema norü äëxgacügü ga Yudaánecüãxgü rü natanügu naxägü rü ínamemare nax nüxna nadaugüxü ga yema duüxügü ga íanetapüxwa puracüexü. Rü yema togü ga puracütanüxügü ga nutaarü nugüruügü rü napuracüeama, notürü äxneäcüma nananugüama ga nutagü. ¹⁸Rü guxüma ga yema puracütanüxügü rü nügücüwawa nanatuxëxë ga norü tara. Rü yema cornéaarü cueruxü rü chauxütawatama nayexma nax yemaacü nüxü natauxchaxüçax nax paxama yacaxüãxüçax ga uanügü.

Neemíaxü nimaxgüchaü

6 ¹Rü yema torü uanügü ga Chaübára rü Tobía rü yema Árabe ga Yechéü rü yema togü ga torü uanügü rü nüxü nacuächigagü nax wena chanamexëëxü ga yema íanearü poxeguxütapüx. Rü taxuxüma ga ngextá íyangoxnaxüwa rü nüxü chaxüpetü ga nax chachauxtaxü. Rü norü íãxgüxícatama nixí ga choxü taxuxü nax chanucuxü. ²Rü yemaçax ga yema

chorü uanügü ga Chaübára rü Yechéü rü chauxütawa namugagü nax chamaxã nangutaquexegüxcax nawa ga wüxi ga ãane ga Ónuarü ngatexüwa yexmane. Notürü yema nagu naxinüexü nixí nax yemaacü choxü yamaxgüchaüxü. ³Rü yexguma ga chamax rü yéma chanamugü ga duüxügü nax namaxã nüxü yanaxugüxcax nax chama rü taxucürüwa yéma chaxüxü yerü nataxüchi ga chorü puracü, rü changechica yerü chi yéma chaxüxgu rü yema puracü ga íchaxüxü rü chi ínayachaxächi. ⁴Rü ägümücüexpüxcüna nixí ga chauxcax yéma namugagüxü, notürü ga chama rü noxriäcütama chanangãxü. ⁵Rü yexguma ga nüma ga Chaübára rü norü 5 expüxcüna wüxi ga norü duüxümaxã chauxcax yéma namuga, rü yematama ore ga noxri chauxcax yéma namaxã namugaxütama nixí ga nagu naxümatüxü ga yema popera ga yéma chauxütawa nangexü. ⁶Rü yema popera rü nhaxü nagu naxümatü: “Nua rü duüxügütanuwa rü Yechéüxütawa nüxü taxinüe nax cuma rü ngëma Yudéugümaxã nagu perüxínüexü nax tama äëxgacüga pexínüexü, rü ngëmacax yixíxü nax ípenamexëëxü i ngëma naxtapüx ya yima ãane. Rü ngëxgumarüxü ta nüxü chaxínüchiga nax cuma tá yixíxü i äëxgacü quixíxü. ⁷Rü cumax rü marü nüxü cuxuneta i orearü uruügü nax ngëma naxunagügüxcax nax cumax nax äëxgacü quixíxü i Yerucharéüwa, rü nüxü yaxugüxcax nax marü nayimaxü ya äëxgacü i Yudáanewa. Rü ngëma ore rü ngürüächi tá nüxü naxínü ya äëxgacü ya Artayére, rü ngëmacax name i nua

cuxü rü ngíxã yigümaxã tidexagü”, nhanagürü ga yema popera. ⁸Rü yexguma ga chamax rü chanangãxü rü nhachagürü: “Tama aixcuma nixí ga yema nüxü cuxínüchigaxü yerü yema rü cumatama nagu curüxínümarexü nixí”, nhachagürü. ⁹Rü yemaacü toxü naxaxünegü, yerü toxü namüëxëëchaü nax nüxü tarüchaxüxcax nax tapuracüexü. Notürü ga chama rü yexeraäcü chanaxüama ga yema puracü.

.....

¹⁵Rü meama Elúarü tauemacüarü 25 ga ngunexügu (setébru 25) nixí ga nagüxü ga guma ãanearü poxeguxütapüx. Rü yema puracü rü meama 52 ga ngunexü nagu tinge. ¹⁶Rü torü uanügü rü guxüma ga yema togü ga nachixüanecüäx ga torü ngaicamána yexmagüxü rü nüxü nacuáchigagü ga marü nax yanguxü ga guma ãanearü poxeguxütapüx. Rü yemacax ga nümagü rü poraacü namüë rü nixãneächitanü yerü nüxü nicuaxächitanü ga yema puracü ga taxüxü rü Tupanaarü ngüxëëmaxã nax yanguxü.

.....

Duüxügü rü norü ãanecax nawoegu

7 ¹Rü yexguma marü nagüxgu ga Yerucharéüarü poxeguxütapüx rü nanucuxgu ga norü íäxgü, rü nüxü naxunetagu ga íäxarü daruügü rü wiyætanüxügü rü Lewítanüxügü ga chacherdótegüarü ngüxëëruügü ixígüxü.

.....

⁷³Notürü yema chacherdótegü rü Lewítanüxügü rü íäxarü daruügü rü wiyætanüxügü rü yema Tupanapatawa

puracüexũ ga paxaãchi irüngũexũ rü wüxichigü norü ñanegüwa nixichigü wüxigu namaxã ga yema togü ga duũxügü.

.....

**Tupanaarü mugü rü guxũ ga
duũxügüpezewa nüxũ
nadaumatügü**

8 ¹Rü guma norü 7 ga tauemacügu (setébru) rü guxũma ga yema duũxügü ga marü norü ñanewa iyexmachigüxũ rü wena Yerucharéüçax nawoegu nax nüxũ naxinüexüçax ga Tupanaarü ore. Rü yema ñanearü ngutaquexechica ga Ìax ga Dexágu áégaxüarü toxmáxtawa yexmaxügu nangutaquexegü. Rü nhuxüchi ga nüma ga duũxügü rü chacherdóte ga Édraxũ nhanagürügü: “¡Ëcü nua nange i ngëma Cori ya Tupanaarü mugüpane ga Moiché ümatüxũ naxçax ga tórü oxigü ga Iraéutanüxügü!” nhanagürügü. ²Rü nüma ga chacherdóte ga Édra rü yéma nanange ga yema Tupanaarü mugüpane napexewa ga yema duũxügü ga yexma ngutaquexegüxũ ga yatüxũ rü ngexü rü ngextüxücügü rü pacügü. ³Rü exüwa inanaxügü rü nhuxmata tocuchiwa nangu nax duũxügüçax nüxũ nadaumatüxũ ga Tupanaarü mugü nawa ga yema ñanearü ngutaquexechica ga Ìax ga Dexágu áégaxüarü toxmáxtawa yexmaxũ. Rü guxũma ga duũxügü rü meama inarüxinüe ga yema Tupanaarü mugü. ⁴Rü nüma ga chacherdóte ga Édra rü nachinagü nagu ga wüxi ga chinagüruxũ ga mürapewanaxçax ga woetama yemaruxũ yexma üxũ. Rü norü tügüncüwaguama nachigü ga

Matatía, rü Chéma, rü Anía, rü Uría, rü Ichía rü Maachía. Rü norü toxwecüwaguama nachigü ga Pedaía, rü Michaéu, rü Maquía, rü Achüü, rü Abadána, rü Yacaría rü Mechuráü.

.....

⁸Rü nümagü rü tagaäcü duũxügüçax nüxũ nadaumatügü ga yema Tupanaarü mugüpane. Rü nhuxüchi meama duũxügümaxã nanangoxëxë ga yema ore nax nüxũ nacuxgüxüçax nax taxacüchiga yixixũ. ⁹Rü guxũma ga duũxügü rü yexguma nüxũ naxinüegu ga yema Tupanaarü mugü rü naxauxe. Notürü ga chama ga äëxgacü ga Neemía, rü nümatama ga chacherdóte ga Édra, rü yema tomücügü ga Lewítanüxügü rü tanataäxëxëxë ga yema duũxügü, rü nhatagürügü nüxũ: “¡Tauxü i pengechaxügüxũ rü pexauxexü! Erü nhama i ngunexü rü woetama tórü Cori ya Tupanaçax ítanaxüxüchi”, nhatagürügü. ¹⁰Rü nhanagürü ta ga Édra: “¡Ëcü mea peyachibüe rü wíü ya maixcuracü peyaxaxü rü tüxna pexu ya texé ya tüxü nataxúxe i tümaarü ðna nax wüxigu petaäxëgüxüçax! Erü nhama i ngunexü rü woetama Cori ya Tupanaçax ítanaxüxüchi. Rü ngëmacax tama name nax pengechaügüxü erü ngëma taäxë i tórü Cori ya Tupana tüxna äxü rü tórü poxüruxü nixü”, nhanagürü. ¹¹Rü yexgumarüxü ta ga nüma ga Lewítanüxügü rü duũxügümaxã nüxũ nixugüe rü nhanagürügü: “Marütama nax pexauxexü. Erü nhama i ngunexü rü woetama Cori ya Tupanaçax ítanaxüxüchi”, nhanagürügü. ¹²Rü yexguma ga nüma ga guxũma ga

duñxũgũ rü chibüwa rü axewa naxĩ rü namücügümaxã nangaugũ ga norü õnagü. Rü yemaacü nanaxüchigagü ga yema ngunexũ, yerü nüxũ nicuaxãchitanü ga yema Édra nangüexêexũ.

.....

Édra rü Tupanamaxã nüxũ nixu ga Iraéutanüxũgüarü chixexũgü

9^{1,2}Rü gumátama tauemaciáru 24 ga ngunexũgu rü nüma ga Iraéutanüxũgü rü nangutaquexegü nax naxaureexũcax. Rü nüxna nixígachi ga yema duñxũgü ga tama Iraéutanüxũgü ixígüxũ. Rü témüxũ ga naxchirugu nicuxgü rü waixümütexe nügüeru nagünagügü. Rü yexma nachigüácüma Tupanamaxã nüxũ nixugüe ga noxrütama chixexũgü rü nüxna nacuaxãchie ga norü oxigüarü chixexũgü rü ta. ³Rü nachicawatama nayexmagüyane rü tamaepüx ga ora ningegü ga nüxũ nax naxĩnüexũ ga Cori ya Tupanaarü mugü. Rü naétü to ga tamaepüx ga ora ningegü ga Tupanamaxã nüxũ nax yaxugüexũ ga norü chixexũgü rü Tupanaxũ nax yacuaxüügüxũ. ⁴Rü yemawena ga yema Lewítanüxũgü ga Yuchué, rü Binúi, rü Caxmié, rü Chebanía, rü Búni, rü Cherebía, rü Báni rü Quenáni rü yema chinagüchicagu naxígü rü yéma tagaäcü Cori ya Tupanamaxã nidexagü. ⁵Rü nhuxüchi yema Lewítanüxũgü ga Yuchué, rü Caxmié, rü Binúi, rü Achanía, rü Cherebía, rü Odía, rü Chebanía rü Petafa rü duñxũgüxũ nhanagürügü: “¡Écü, ipechigü rü nüxũ pecuaxüxũgü ya Cori ya Tupana i

guxũgüma maxücü! Rü naéga rü naxüüne rü guxũétüwa nangexma, rü ngëmacax name nixĩ i nüxũ ticuaxüxũgü”, nhanagürügü. ⁶Rü nhuxüchi ga nüma ga Édra rü nayumüxê rü nhanagürü: “Pa Tupanax, cuma nixĩ i Cori quixixũ rü nataxuma i to. Rü cuma nixĩ ga cunaxüxũ ga dauxũgüxũ i naane, rü ngëma dauxũgüxũ i naaneétüwa ngëxmaxũ rü guxũma i norü êtagü. Rü cuma nixĩ ga cunaxüxũ ga nhama i naane, rü taxtügü, rü guxũma i taxacü i nawa ngëxmaxũ. Rü cuma nixĩ i maxũ nüxna cuxãxũ i guxũma i ngëma maxêxũ. Rü ngëmacax nixĩ i cuxũ yacuaxüügüxũ ya êtagü ya dauxüwa ngëxmagüxũ.

.....

⁹Cuma rü tüxũ cudau ga nhuxãcü ngúxũ nax tingegüxũ ga torü oxigü ga Eyítuanewa. Rü tüxũ cuxĩnü ga nax taxauxexũ ga Már ga Dauchiüxücutüwa. ¹⁰Rü cuma rü Faraóüpexewa rü guxũma ga norü ngüxêëruügüpexewa, rü guxũma ga yema nachixüanecüãxgü ga duñxũgüpexewa, rü cuyaxüchigüama ga taxũ ga mexũgü ga curü üünemaxã cuxüxũ. Yerü nüxũ cudau ga nhuxãcü totanüxũgümaxã chixri inacuaxgüxũ, rü ngëmacax cutachigaxũ i nhuxmax.

.....

³⁴Notürü woo ga torü ãëxgacügü rü yatügü ga tomaxã icuaxgüxũ, rü chacherdótegü, rü bai ga torü oxigü rü taguma nayangüxêëgü ga curü mugü rü taguma naga naxĩnüe ga curü ucuxëgü ga namaxã nüxũ quixuxũ. ³⁵Rü yexguma torü oxigüna cunaxãxgu i nhaa naane nax noxrü yixixũcax, rü woo poraäcü nüxũ curüngüxêë, notürü

togumare narüxĩnie. Rü woo nüxna nax cunaxãxũ ga norü yemaxũgũ, rü woo naxmexgu cunayixẽxẽ ga nhaa nachixũane ga mea nanetü nawa yaexũ, notürü taguma cuxũ nicuaxũxũgũ, rü tama nüxũ narüxoechaũ ga nacüma ga chixexũgũ. ³⁶Rü dücax, rü nhaa tochixũane ga torü oxigüna cuxãxũ nax nagu natogüaxũcax ga nabü, rü nhuxmax rü nhaatama naanewa rü to i nachixũanemexẽwa tangexmagü. ³⁷Rü guxãma i tomox, rü torü wocagü, rü tonetügü rü nhuxmax rü torü chixexũgügagu torü uanügü i ãëxgacügümexẽwa tangexmagü, rü nüma nanaxwaxexũãcü tomoxã inacuax. Rü ngëmacax i nhuxmax rü porãcü tanaxixãchiãëtãnu”, nhanagürü ga Édra norü yumüxẽwa.

**Iraéutanüxũgüarü ãëxgacügü rü
Tupanamaxã inaxunetagü nax
Tupanaarü mugüga naxĩnüexũcax**

³⁸Rü yemacax ga guxãma ga toma rü Tupanamaxã nüxũ tixu nax aixcuma tá naga taxĩnüexũ ga norü mugü. Rü napexewa poperagu tanaxümatü ga yema namaxã nüxũ tixuxũ. Rü toma ga ãëxgacügü, rü Lewítanüxũgü, rü chacherdótegü rü toéga nagu

taxümatügü nax aixcuma tá tayanguxẽẽxũ ga yema torü uneta.

**Duũxũgü rü to ga uneta
Tupanamaxã nixugü**

10 ²⁸Rü toma tixigü ga yema poperagu togü taxümatüéagaxũ naxcax ga guxũma ga yema togü ga duũxũgü ga chacherdótegü, rü Lewítanüxũgü, rü Tupanapataarü iãxaru daruũgü, rü wiyaetanüxũgü, rü yema puracütanüxũgü ga Tupanapatawa puracüexũ, rü guxũma ga yema togü ga duũxũgü ga wüxigu naxmaxgümaxã rü naxacügümaxã Tupanacax nüxna ixígachitanüxũ ga yema togü ga nachixũanecüãx ga tama Tupanaxũ cuaxgüxũ. ²⁹Rü guxãma ga toma rü mea tanayauxgü ga yema uneta rü nüxũ tixu nax aixcuma tá mea naga taxĩnüexũ i ngëma Tupanaarü mugü rü ucuxëgü ga nüma ya Tupana norü duũ ga Moichéna naxãxũ. ³⁰Rü wüxigu nagu tarüxĩnie rü tama tanaxwaxe i toxocügü rü tonegü rü ngëma duũxũgü i tama Iraéutanüxũ ixĩxũmaxã nixãte rüexna nixãxmax.